

Date – 13/05/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Health Minister Pi Lalrinpui'n Mizorama doctor indaih lohna zualpui phuhruk nan MBBS 20 leh BDS 5 lakna tur thil pawimawh te hmanhmawh taka buaipui mek a nih thu a sawi.
2. Fisheries Department leh Central YMA ten Luidung Humhalh zui turin vawiin khan thawhhona thuthlung an ziak.
3. Central Bureau of Investigation (CBI) chuan NEET (UG) 2026 exam paper putru-a puh chungchangah thubuai a ziaklus
4. Tamil Nadu politics inlumlet mekah AIADMK MLA 30 chuan TVK sawrkar an thlawp thu an puang.



HEALTH MINISTER

Health Minister Pi Lalrinpui'n Mizorama doctor indaih lohna zualpui phuhruk nan MBBS 20 leh BDS 5 lakna tur thil pawimawh te hmanhmawh taka buaipui mek a nih thu a sawi.

NABARD RIDF sum cheng nuai 600 senga sak Tlabung-a Sub-District Hospital building thar a hawna ah he thu hi sawiin Pi Lalrinpui chuan mipuite'n tangkai zawka damdawi in an chhawr theih nan a enkawl na leh inrelbawl na lam a pawimawh hle tih sawiin, natna zawn chhuah hna thawktu laboratory lam te, damlo enkawltu nursing lama thawkte leh doctor te, eirawng bawltu bakah a tifaite thlenga tha tak leh inpawh taka an thawh ho a tul hle tih a sawi a. Tlabung Sub-District Hospital chu hmanraw tha zawk leh thawktu tam zawk nena thuan changtlun a nih chuan hmunpui pan ngai thin tam tak chu enkawl theih an nih tawh dawn avangin mipuite'n an chhawr tangkai leh zual thei dawn niin a sawi.

Sub-District Hospital Tlabung hawnaah hian West Tuipui bialtu MLA Pi Prova Chakma chuan Tlabung damdawiin sak thar leh tihchangtlun a ni chu lawmawm a tih thu sawiin, tha zawka thuan changtlun zel a nih a beisei thu a sawi a ni.



FLORENCE NIGHTINGALE AWARD

Nurse hnathawk tha chawimawina, National Florence Nightingale Award chu Tuichawng Ayush Health & Wellness Centre-a Health Worker thawk lai Pi Lalenthangi Hnamte hnenah India President, Pi Droupadi Murmu-in a hlan.

International Nurses Day, 2026 pualin Sorkar laipui chuan nimin khan New Delhi-a President chenna Rastrapati Bhavan-ah Nurse hnathawk tha chawimawina, National Florence Nightingale Award hi a sem a. chawimawina hlan zingah hian Lunglei District chhung Tuichawng Ayush Health & Wellness Centre-a Health Worker thawk lai Pi Lalenthangi Hnamte pawh hi a tel a. He chawimawina hian Certificate bakah sumfai cheng nuai 1 leh medal a keng a. Mizoram Sorkar pawhin kum 2024 atang khan National Florence Nightingale Award dawngtute chu chawimawina thuziak leh sumfai cheng sing 5 a hlan thin a ni.

National Florence Nightingale Award hi Mizoram atangin mi 17-in an dawng tawh a, Pi Lalenthangi Hnamte hi a 18-na a ni.

<><><>

MHIP

MHIP General Headquarters chuan Mizoram Police leh Uttarakhand Police ten kumin May ni 5-a an luhchhuah tak Beauty Queen Salon & Spa, Rudrapur, Uttarakhand a thawk tur leh inzawrh luihtirtu a puh Lalnunsiami (30), Kolasib, New Diakkawn leh a pasal anga a neih, Spa neitupa Mohmmad (31) Uttar Pradesh, tuna Rudrapur-a awm mek man chhuah an ni chu lawmawm an tih thu an sawi.

MHIP thuchhuah tarlan danin thil bawlhhlawh taka mahni Mizo puite hnuklut tu chu an dem thu sawiin Dan hnuaiah an phutawh hremna an hmuh ngei theihnan MHIP chuan theihtawpin hma an la zel dawn an ti a, Phai lama hmeichhia hnathawk tura kal tumte an fimkhur zel a, mahni fa te an him zel theihnan Mizote tanrual a tul thu a sawi a, Mizo hmeichhia zawng zawng leh Mizoram mipuite fimkhur tur leh tangrual tlang zel turin a ngen a ni.

<><><>

FISHERIES MOU

Fisheries Department leh Central YMA ten Luidung Humhalh turin nimin khan thawhhona thuthlung an ziak a. Fisheries Minister Pu Lalthansanga Pisa-ah Fisheries Department aiawhin Director Pi Zonuntluangi'n hming a ziak a, Central YMA aiawhin President Pu R. Lalnggheta'n hming a ziak a ni.

Fisheries Minister Pu Lalthansanga chuan Fisheries Department tan luidung zawng zawng vil a harsat thu sawiin, Tlawmngai pawl lian ber YMA ten luidung humhalh nachang hria a, Branch ten theihtawp a mahni huamchhungah hma an lo la thin chu a lawmawm hle a ni, a ti a. Lungrual taka Fisheries Department leh YMA te thawhhona hian rah tha a lo chhuah tawh thin a, kum 2 an thawhho lehna turah hian Fisheries Acts leh Rules hnuaiah awmze nei leh tangkai zawka Mizoram luidung hausakna hman kawngah hma an sawn phah ngei a beisei thu a sawi a ni.

Inkhawm kaihruiatu Fisheries Secretary Pu Lalrothanga chuan YMA te nena thawhhona tha tak an nei chu lawmawm a tih thu a sawi a. Sangha vulh kawnga farmer te hmasawn zelna tur leh Mizorama sangha tam zawk thar chhuahna atan hman tangkai a tul thu sawiin tha zawka thawhho zel a beisei thu a sawi a ni.

Fisheries Department leh Central YMA hian kum 2021 atang khan Thawhhona Thuthlung hi kum 2 atan zel an lo ziak tawh thin a, tunah hian a tum 3 na atan thawhhona thuthlung hi an ziak leh a ni. He thawhhona hian Mizoram luidung nungcha venhim leh humhalh kawngah nasa takin rah tha a chhuah zel a, tunah hian YMA Branch 93 zetin luidung humhalh bik an nei a. He an hmalakna avang hian Mizoram Luidungah sangha an pun phah mek zel a. Chu bakah luidung humhalh inzirtirna kawngah te, luidung venhim leh dan phal loh hmanrua hmanga sangha man chingte manchhuah kawngah Fisheries Department ten chak zawkin hma an lak theih phah a ni.

<><><>

NGOPA JAC

Ngopa Joint Action Committee-in NH 102B Package-2 siam mekah an ngennain awmzia a neih loh chuan naktuk May ni 14 ah Total Bandh huaihawt an tum.

Ngopa Joint Action Committee chuan, NH 102B Package-2 siam mekah hian hna a chhiain a nih tur ang a ni lo nasa niin an sawi a. Zangnadawmna hnawl chungchang te, khaw chhung kawng peng hrang hrang laih chhiat siam that leh loh te, kawng zau zawng a nih tur ang tling lo lutuk te, hmanrua hman a chhe lutuk leh thil dang tam takah a nih tur ang a ni lo a awm avangin NHIDCL, Contractor leh Chief Secretary hnenah hmalakpui tura an ngenna chuan awmzia a nei lo ni-a a lan thu an sawi a. An ngennain awmzia a neih loh chuan naktuk May ni 14 ah Ngopa khaw chhungah Total Bandh huaihawt a ni dawn a, hei hian awmzia a nei lo zel a nih chuan NH 102B chu tiam chin awm lova kha a ni dawn tih an sawi.

<><><>

RD MINISTER

Rural Development & Administration Department Minister Prof. Lalnilawma chuan 'Community Managed Training Centre (CMTC)' leh 'Gender Resource Centre (GRC)' Sangau a hawng.

Prof. Lalnilawma chuan a mamawhtuten tangkai taka an hman leh malsawmna thlentu ni turin CMTC leh GRC chu lawm tak in a hawng tih a sawi a. Sangau RD Block - tana hmasawmna thlentu pawimawh tak a nih a beisei thu sawiin, a taka chhawr tangkai thiam a tul dawn hle a ti a. Sawrkarin khawtlang tan thil tha tak tak a siam thin a, a enkawl lamah thahnemngaih a tul tih a sawi bawk.

Lawngtlai East bialtu MLA Dr. Lorrain Lalpekliana Chinzah pawhin thu sawiin hmasawmna thar chu sawrkar hmalakna pawimawh tak a nih angin, khawtlang mipuite pawhin hlut thiam a tul hle a ti a. A enkawltu tur Far Pak Cluster Level Federation- te pawhin thahnemngai taka enkawl turin a chah a bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



NEET

Central Bureau of Investigation (CBI) chuan NEET (UG) 2026 exam paper putru-a puh chungchangah thubuai a ziaklut. Union Ministry of Education hnuai Department of Higher Education in lekhka a thehluk behchhanin CBI chuan thubuai hi a ziaklut a ni.

He thubuai kaihnawihah hian Rajasthan Police Special Operations Group (SOG) chuan mi 15 an hreng tawh a. He pawikhawihnaa a bultumtu ber nia puh Jaipur mi Manish pawh SOG te hian an man tawh a ni.

Puan tawh angina National Testing Agency (NTA) chuan kumin 2026 NEET (UG) exam tun thla ni 3 a neih chu a cancel a. Social Media lama tarlan danin NTA chuan zirlaite tana tha zawk turin he thutlukna hi siam anih thu leh mipuiten NTA ah rinna an nghat tih a hrait avangin exam neih tawh chu pawm loh a rel a. NTA chuan exam neih leh hun tur hi a la puang lo a ni.



TAMIL NADU

Tamil Nadu politics inlumlet mekah vawiina Joseph Vijay-a kaihhruai TVK sawrkar fiah anih hmain nimin khan AIADMK MLA 30 chuan TVK an thlawp thu an puang. AIADMK te hi pawl hnihah an inthen a. Chief Minister hlui leh AIADMK General Secretary Edappadi K.Palaniswami chaun an party MLA te chu TVK sawrkar thlawp lo turin a hriattir a. Senior leader Agri Krishnamurthy pawhin an MLA te chu an party atanga hnawhchhuah hial an nih theih thu a sawi.

Hetihlai hian pawl lehlama awm MLA 30 rual chuan AIADMK legislature Party leader atan S.P. Velumani an thlang a. Minister hlui C.V Shanmugam-a hoin TVK sawrkar an thlawp dawn tih an puang a ni.



CJI

Chief Justice of India Surya Kant chuan ramchhunga Court tih changkanna tur ngaihtuatu high-powered Committee din a nih thu a puang. He Committee hi Supreme Court Judge Justice Aravind Kumar chuan a kaihrui dawn a. He committee hian COurt tihchangtlun leh tih changkanna tura sum leh pai mamawh leh thildangte an ngaihtuah ang a. Kumin August ni 31 ah an rawtna te hi Prime Minister Advisory Council ah an thehlut ang.

